

Mokokchung College of Teacher Education pur foundation day amung



Mokokchung, 12th FAB (TYO): 12th Feb, 2025 nü Mokokchung College of Teacher Education (MCTE) pur 14 buba foundation day sentong parnok college kilem nung ayongzüka amung.

Iba sentong nung Dr. Tamsurenla, Vice Principal, MCTE-i jembidang, 2012 küm iba riju tenzüker arudang Tsüngremer taochi manung len aniba asoshi Pa nem tenünsang agütsü. Iba college tenzükdang tesayur regular ana (2) dang liasü aser D.I.E.T. Mokokchung, SCTE Kohima aser government tesayur balalai yaritepba

bilemteter, ta lai menungraseta ashi.

Laisa taoba principal-tem aser kaketshir-tesayur shirnoki iba riju ajungkettsü asoshi shilem tajung agia takok tulu bener arutsüogo, parnok ajak dang pelaba metetdaksü. Iba den külemi tang shirnok tezüngdak lir, talisa 2023-2024 4th semester nung shirnok lir, taoba mapang ama maneni takok tulu bener arutsü ayongzük. Laisa tesayurtemi nentaka sayuba den IQAC Coordinator, tesayur Kerilhusa lenisüba nung tesayurtemi NAAC dak sentakba mapa meranga inyakba

asoshia pelaba metetdaksü.

"The Super Intelligence Threat - Can We Control AI?" onük nung ajemdaker Er. Ngangsham N. Chemdok, Lecturer, Computer Science & Engineering, ICIT, Mokokchung-i tongti o jembia sensaksem tajung liasü.

Tanep tesayur Dr. Rijingkhum-i college wako atsüketa Imtikumzuk-i anir college naklo (anthem) ken tena iba sentong meraketa tenzük. Tesayur Sekulu Nienu, iba sentong nung menden liasü. Yangji azüngertemi shilem balala agia sentong tobur jungdaksü.

NPGs balala nem saru magütsütsü: ATKK

Dimapur, Tsüklai/February 12 (TYO): Asuto Tokukujo Kukami Kuqhakulu (ATKK) ajanga ADC Aghunato nem tezüluba ka agütsüba nung, Naga Political Groups (NPGs) balalai nüchiso bushir tenüng nung saru balala saruba anema nokdaka Sumi Baghi Hoho ajanga July 20, 2024 nü pangzüng ka yanglua NPGs tem 'unified framework' ka küboki mait tashi Sumi nunger aliba tesem nung NPGs nem saru tabu balala agütsüba January 1, 2025 nü nungi tenzüka anentsü renemba nung onok nokdaka lir, ta shia liasü.

Naga Political Groups balalai saru meshiba ajunga nokdangsü atema Sumi Baghi Hoho-i mera agiba ya talisa Naga nunger telungjem aser ochi nung nokdaksüba onük nung ajak ka kuma lungjemtsü nüngdaker ta angatetba nungi adokba lir.

NPGs temi saru balala meshiba bentettsü asoshi aser

NPGs ajunga tangatetba ka nung lungjemer nokdaksütsü asoshi iba tenokdangba ya tongtiopang lir. Tang NPGs ajanga saru balala meshiba ajanga nüburtem mangmandaksür aser timtem balala ajurur aser local economy nung kongshia ochimashi mapa inyaktsü lenmang lapoktsür, ta ATKK ajanga ashi.

Sumi Baghi Hoho ajanga NPGs ajunga dang lungjemtsü aser Nagaland nung aliba nübur ajunga ajangzüksüsa 'sustainable economic environment' ka yangertsü ajungshir, ta ashi.

Iba dak sendakba nung Zunheboto district nung Aghunato Sub-Division kübok yimtsüng 20 agi kumtetba ATKK-ia Sumi Baghi Hoho pangzüng nung bhukuma nokdakter aser Hoho telemtetba nung mapa kuma inyaktsü, ta ATKK ajanga ashi.

Maneni ATKK jurisdiction nung terenlok mapa inuakba contractors/firms kibur temi

sorkar ajanga yangluba DPR nung aliba ama mapa inyaktsüla. Construction mapa nung sub-standard materials amshiba atema ATKK-i tatok magütsütsü aser DPR nung aliba ama mesüi terenlok mapa inyakra ozüng agi melaba mera agütsü, ta ashi.

ATKK ajanga terenlok mapa inyakba kanga junga meittsü, anungji ajaki ochishia inyaktsü ayongzüker aser ozü litsü nung terenlok mapa inyakba mapang senotsü meshiba, merenshiba mesüra amokmerenba amala timtem ajurura onok nem metetakjang, ta ashi.

Iba amala timtem ajurudang onok nemo sang magütsüra onokia meyaritsü, ta ATKK ajanga ashi.

Ano ATKK züngsemtem lia mapa inyakba kanga junga asadanga tendangba sülen ang 'work completion certificate' agütsütsü department balala dang ayongzüker, ta ATKK sangdong ajangasa ashi.

Ongpangkong Senso Telongjem Dimapur ketdangpur melentepogo



Dimapur, Tsüklai/February 12 (TYO): Ongpangkong Senso Telongjem Dimapur (OSTD) ketdangpur tejen-tasen menden melentepba sentong ka February 12, 2025 nü agia liasü. Iba den külemi OSTD Kimen ka ama M. Longri Pongen (Mangmetong) kibongi küm 32 (1993-2024) tenzüka arur pa melen Imtiangzük (Longsa)

shima liasü.

Tejen ketdangpurtem tir Imosong Imsong (Ungma), tatong tir Nokenwaba Kichu (Chungtia), tongti zülur Nunghimeren Kichu (Khensa), repsem zülur Chubamaong Atsongchanger (Mokokchung), sen otsü zülur Purnukshi Longkumer (Kubza) aser kimen M. Longri Pongen

(Mangmetong) liasü.

Tang shimba tasen ketdangpurtem tir T. Benjong Longchar (Chungtia), tatong tir Chubatemjen (Longsa), tongti zülur Nunghimeren Jamir (Chuchuyimpang), repsem zülur Imtilepden Jamir (Settsü), sen ostü zülur. Ayimmeren (Longkhum) aser kimen Imtiangzük (Longsa) alitsü.

NDPP-i Nagaland Super League ayonger nem tenünsang agütsü

Dimapur, Tsüklai/February 12 (TYO): Nagaland Super League (NSL) tenzüktettsüsa mera balala agitetba asoshi pelar aser tenünsang agütsür, koba January 28, 2025 nü Chief Minister Neiphiu Rio-i semzüksü, ta Nationalist Democratic Progressive Party (NDPP) sangdong ka ajanga ashi.

State nung football asayatsü sempet alirtem temaba jenjangi ajungkettsü asoshi maongka agütsütsü aser linük aser alima sapang nung dangartem den tokteptsü asen CM mangdang aliba asangsang kumogo.

Pa mangdang aser iba mangdang asangsang kumdaksütsü asoshi yakyaka shilem agiba atema CM nem tenünsang agütsür, ta NDPP sangdong ajanga ashi.

Ano NSL ayonger, Nagaland Football Association, Nagaland Olympic Association, aser Government of Nagaland, Department of Youth Resources & Sports ajanga state nung football jangrar aser asayatsü sempet alirtem mangdang aser tejangraba asangsang kumdaksüba asoshia tenünsang agütsür, ta ashi.

NSL ya national aser international jenjang den sako

akumtsüsa inyaktsü iba asayamung ayonger dak teimla lir.

Kasa mapang IDAN chairman Abu Metha-i anir Investment & Development Authority (IDAN) ajanga mapang ajak nung yaritepba ngua pela agizüker aser tenünsang agütsür, kechiaser IDAN-i meranga inyakba ajanga NSL nung investors, corporate teyari aser sponsorship balala angu, ta ashi.

Iba ya ajanga Peoples Democratic Alliance (PDA) sorkari state nung ki o jen terenlok kisüng masü saka lenla ajak nung terenlok alitsü mangdang aliba sayur.

NSL ya All India Football Federation (AIFF) ajanga recognize süogo aser tangbo ibai AIFF indang sentong ka amai lir. Iba asayamung tenzüka sentong nung AIFF tir adenba ajanga iba league tuluba aser tajungba kuma aintsü teimla aliba ajiteter aser tarutsü nung India aser bendang lima nungia asayartem arua shilem agütsü imlar, ta NDPP sangdong ajanga ashi.

Iba league nung arua shilem agiba clubs aser franchises ajunga nem tenünsang agütsür, ta sangdong ajangasa ashi.

FAC nung tesayur ana den tepila sentong agi



Dr. Aotemshi

Tiarenla

Dimapur, Tsüklai/February 12 (TYO): Fazl Ali College, Mokokchung nung professor mapa nungi anisüngzüker ana, Tiarenla, Associate Professor & Head of the Department of Philosophy aser Dr. Aotemshi I, Associate Professor & Head of the Department of Mathematics den tepila sentong February 11, 2025 nü agia liasü.

College Principal Dr. I. Wati Imchen-i tepela o jembidang iba anogo ya tenünsang agütsüba anogo lir ta ashi.

Dr. I. Wati Imchen-i Tiarenla ya bendanga agütsüba tesayur tesüngmangtsüka liasü aser lai college asoshi mapa tajung jenti inyakogo aser lai ANGCT indang constitution mezüng yanglu aser Literary Committee nunga mezüngpur liasü, ta ashi.

Dr. Imchen-isa Dr. Aotemshi I ya kanga anükalemer aser tanüla temeshi agi sünga aliba nisung ka lir, shibai Tsüngrem tenzüksü asoshi takum

bendanga agütsü ta ashi. Dr. Aotemshi-i pa mission mapa inyaktsü mechi anojungi voluntary retirement agütsü telemtetba agiba asoshia tenünsang agüja liasü.

Iba tepila sentong nung külem tesayurtem, FACTA aser FACSU nungia o jembia liasü.

Mapa nungi anisüngzüker Tiarenla aser Dr. Aotemshi I natia temulung shiranga o jembia aser college administration dang pelaba lemsatop aser nisung ajak dang ochishia, ajemalua aser nendaka agütsür külemi inyaktsü ayongzüka liasü.

Iba sentong nung Naomi, Assoc. Professor & Head of the Department of Botany menden liasü, tesayurtem aser kaketshir temi temeja ken ka-ka aten aser Dr. Lipokrenla Jamir, Assoc. Professor & Head of the Department of Political Science ajanga temoatsü meshia sarasademer sentong tembanga liasü.



February 12, 2025 nü France yimtiba, Paris nung Ato kilonser Narendra Modi-i Google CEO, Sundar Pichai ajurudang tangokba noksa nung angur.

PM Modi aser France Tir, Emmanuel Macron na senden amen

New Delhi, Tsüklai/February 12 (Agencies): Bodhbarnü Ato kilonser Narendra Modi aser France Tir, Emmanuel Macron na senden amenba sülen linük anati tezüngzüktep aika agi aser linük ana tsüngda defence, civil nuclear energy aser space nung amalitepa inyakba jenjang asadangogo, ta ketdangsertemi metetdaksü.

Lenir anati India-France Roadmap on Artificial Intelligence (AI) tenzüksü aser 'India-France Year of Innovation 2026' indang logo sayatsüogo.

Ato kilonser Modi-i anogo ananü France semdangba sülen

Ministry of External Affairs (MEA)-i sangdong ka ajanga, lenir anati shishilembaba aser investment tsütsü tesendaktep ano tajungba akümtsü atema jembiba den külemi Indo-Pacific aser alima sabang balala nung longjemer inyaksü bangjemogo, ta metetdaksü.

Lenir anatisa United Nations Security Council nung temelenshi nüngdak ta bangjem aser international onük balala nung linük anati amalitepa inyaksü jembi.

France Tir, Macron-i maneni UNSC nung India permanent züngsem akümtsü

atema pusemtsü, ta metetdaksüogo.

Ano tanga osang ka nung, Bodhbarnü Modi aser Macron nati France kübok Marseille yimti nung Indian Consulate semzüksüogo.

Iba sentong nung adener India aser France nungertemi pepei linük wako amer liasü.

Iba sentong jakdang Modi aser Macron nati Mazargues Cemetery semdang aser Great War mapang taküm bendanga agütsür India nunger sepaitem nem akhüm agütsü.

Tesülen lenir anati lokti nungji kar ajurua jembia liasü.

1984 küm raraba ken o ka nung taoba Congress MP Sajjan aitsüogo

New Delhi, February 12 (Agencies): 1984 küm Sikh nunger anema rara tulu adokba ken o dak sendakba nung Bodhbarnü Delhi nung aliba Rouse Avenue court-i taoba mapang Congress MP, Sajjan Kumar aitsüogo.

Special Judge Kaveri Baweja-i Kumar anema obendang agütsü.

1984 küm November 1 nü Delhi kübok Saraswati Vihar area nung Sikh nunger tebu aser techir na- Jaswant Singh aser Tarundeep Singh na tepsetba ken o nung Sajjan Kumar aitsü.

Sikh nunger anema rara tulu atalokdang Delhi Cantt area nung atalokba tanga ken o ka nung aija Sajjan Kumar ya tang tepuokdak lir. Bodhbarnü pa Tihar Jail nungi Rouse Avenue court-i anir aoba sülen pa aitsüba obendang agütsü.

February 18 nü pa nem temerenshi obendang agütsütsü.

1984 küm October 31 nü taoba mapang Ato kilonser,

Indira Gandhi khasetba sülen lokti tulu kati Delhi tesem ajaklen Sikh nunger amak tenzüka liasü. Parnoki Sikh nunger ki aser shishilembaba kiojen aika rongdoktsüba den külemi Sikh nunger aika tepseta liasü.

Jaswant Singh aser par jabaso Tarundeep Singh na Saraswati Vihar nung tepset aser par kidang nungi auyaba sülen kiji rongdokja liasü.

Court-i, iba rara nung Sajjan Kumar-i shilem agiba dang masü saka lokti tuluji pai ania liasü, ta metetdaksü.

Delhi Sikh Gurudwara Management Committee (DSGMC) general secretary, Jagdip Singh Kahlon-i court obendangji pelaa agizükogo.

Kahlon-i, "Küm 40 tejaklen Sajjan Kumar leniba nung Sikh nunger aika tepset aser tang pa aitsüogo. Iba obendang atema ni court dang pelar. Shibanger aliba ken otem tanaben kakteta bushisüngdangtsü atema SIT

tentetsü tuyuba asoshi ni Ato kilonser Modi aser Home Minister Amit Shah na dang pelar. Jagdish Tytler ken o nunga onoki ochi temeden angütsü imlar," ta metetdaksü.

Sajjan Kumar ya Congress lenir ka liasü aser taoba mapang MP lir. 1977 küm mezüng pai yimtenren nung ajemoka Municipal Corporation of Delhi nung shima liasü. Tesülen pa Delhi Councillor aküm aser 2004 küm Lok Sabha elections nung pai Outer Delhi menden nungi takok ngua liasü.

Sikh nunger bodyguard temi Indira Gandhi khasetba sülen Sikh nunger amaktsü atema Sajjan Kumar-i lokti ajungmesoa liasü, ta aikati kuli agütsü.

2018 küm tanga ken o ka nung Delhi High Court-i Sajjan Kumar aitsüba sülen taküm piyong tepuokdak ayutsü obendang agüja liasü. Iba mapang nungjagi pa Tihar jail nung puok.

India nung minorities anema jembiba shilem 74 agi teimba kümogo: US

New Delhi, February 12 (Agencies): Tesüiba küm ka tsüngda India nung nütsüng ajema alirtem anema tesempa o jembiba shilem 74 agi teimba kümogo, ta Washington nung aliba research group India Hate Lab-i metetdaksü.

Hombarnü sayaba report nungji India nung minorities anema tesempa o jembiba tatalokba 1,165 liasü aser karbo Ato kilonser Narendra Modi aser Union Minister Amit Shah nati jembiba densema lir.

Item tesempa otemji talisa Muslim nungertem anema jembiba liasü; tesempa o jembiba shilem 98.5 bo Muslim nunger anema jembiba lir, ta report nungji shia lir.

Item tesempa o jembibaji talisa BJP-i yimsüsüba state tem mesüra NDA teloktep nung densema aliba party temi yimsüsüba state tem nung liasü.

2024 küm tesempa o jembiba teimba liasü aser 2024 küm ya Ato kilonser Modi-i tasembenbuba tenangzükba agiba küm lir.

Tesempa o jembibaji 2023 küm den medemdangra 2024

küm nungbo anasü agi teimba liasü, ta report nung shia lir.

India Hate Lab-isa, tesempa o jembibaji teimbaka yimtenren lokti sendentem nung, yimsü dak sendakba processions, longkak aita jajaba sentongtem aser sobaliba sentongtem nung jembiba liasü, ta metetdaksü.

2024 küm Lok Sabha elections atema nüboyimba mapang nung tashishitsü o jembiba atema Ato kilonser Modi kanga aija liasü. Rajasthan nung election nüboyimba mapang Modi-i, Congress sorkari tetsürtem indang senti osettemji rakzüker ozüng alema arua alir bendangertem nem agütsüner, ta jembia liasü.

Iba mapang nungji Modi-i, "Congress sorkar aliba mapang nung parnoki, linük rongsen mezüng senmangtsü temedenji Muslim nunger lir. Iba tetezü parnoki iba rongsen ya tanur teimba alirtem, ozüng alema arua alirtem nem agütsüner. Nenoki kanga meranga aazükba sen ozüng alema arurtem nem agütsüner asü?," ta asüngdanga liasü.



February 12, 2025 nü New Delhi nung Union Finance Minister, Nirmala Sitharaman aser Permanent Representative of India to United Nations (UN) in Vienna, Shambhu S Kumaran na senden amendang tangokba noksa nung angur.

PM Modi meyipa aruba sülen Delhi CM candidate sangdongtsü

New Delhi, February 12 (Agencies): Tawa Delhi assembly election nung Bharatiya Janata Party-i takok ngua liasü saka tang tashi Chief Minister tenüng mesangdong.

Osang angazükba agi, February 16 nü Delhi nung BJP MLA temi Legislative Party senden amenba mapang nung parnoki dang Chief Minister shimtsüa akok.

Ato kilonser Narendra Modi-i France semdangba sülen tang US nung lir. Pa US nungi meyipa aruba sülen BJP legislature party-i pa ajurutsü.

Bodhbarnü Delhi BJP Tir Virendraa Sachdeva aser BJP Delhi election in-charge, Baijayant Panda nati senden ka ayongzüka tawa election nung party-i inyaktetbatem asadanga liasü.

Iba senden nungji BJP lenir tain MP, Bansuri Swaraj aser New Delhi menden nungi takok angur Ramesh Bidhuri nata densema liasü.

Iba senden tembangba sülen MLA temi, senden nungji legislature party senden mesüra chief minister menden atema kecha mejembi, ta metetdaksü.

Delhi election nung BJP-i AAP madak takok nguogo, anungji parnoki BJP Tir, JP Nadda ajurunüa liasü, ajisüaka Nadda-i parnok dang Parliament building nung ang pa ajuruang ta ashi, ta MLA temisa metetdaksü.

Senden amentsü jakdang Delhi BJP Unit Tir, Virendraa Sachdeva-i, "Onok külemi mener tan election nung party-i inyaktetba asadangtsü," ta metetdakja liasü.

Mongolbarnüa Union Home Minister Amit Shah aser BJP Tir, JP Nadda na senden mena Delhi Chief Minister menden atema o lemtepa liasü.

Delhi assembly election nung BJP-i menden 48 nung takok angu aser AAP-i tanüngba menden 22 nung dang takok ngua liasü. Congress-ibo menden kata mangu.



February 12, 2025 nü Army temi sepai ka tasü mang süngden bener arudang tangokba noksa nung angur. Mongolbarnü Jammu kübok Akhnoor anasa Line of Control nung IED bomb ka apokba lendong nung sepai ana pokset.



TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 13, 2025

Meputepdaksüba lenir

Peisasa yangluba timtem mekoktet küm ana shi timtema arur tang tesüsa Manipur nung Chief minister N.Biren Singh-i pasasa Chief minister menden nungi aluba ya pa menen agi pa kangshiba mapa ka asütsü. Atangji, pa jakdang inyakertem mapang nunga Manipur ya süngjema aliba state kabo masü liasü. Aji oda, Manipur state tilaka nung ya telongpur telok metsü dak tali tenteta yur, kari Manipur yimten nüchiso asoshi rarar, kari Manipur nungi state balaka razüka onür aser karibo Manipur state kübok meliner ta koba telok dangang angar, koba telok dang manga, tipmadem tensa mapang tamajung aiben ajurua aruogo. Ajisüaka, Manipur nung Biren Singh dang tama inyaker Chief minister-temibo Manipur state nung kodaser merongrongtsü, kodaser azü tokshi aser mangatetep malitsü aser Manipur state mesadangi nübortem ajak longjema aser putepa alitsü ta asüba nung nükenbelem jenti agia anir aruogo. Ajisüaka, Manipur ama kin kidong balala, oshi-oben balala, tamangba yimsü balala aser sobaliba balala ama ka lenitsü asoshi maongka anguba lenir kati pei state nungsa süaka pei kin temeimba saka tangar kinbo bendanger ama züngshir ta asüba temulungjang shisatsü dener yimsü süra, ajibo nübortem rongnung tesempatep aser tetsükchitep metsü proker amai asütsü. Aginüyonga maginüyonga, tang aliba Manipur state ya Meitei, Naga aser Kuki nungertem meyong lir, anungji Manipur nung shibai yimsü südirsüaka kin asem tsüngda metsükchitepdaksüi kati ka akümtsübutepa alitsüsa tangatetba aser maongka agüja anitsübaji Manipur nung lenir ka asoshi teshisadangsü aser teinyaktsü mapa tongtibangtiba lir. Atangji, Manipur government-i ashiba ama, Myanmar nungi Kuki nunger adoka Manipur senso küma aliba agi Manipur nung, talisa, lenden nung alir Meitei nungertem mulung animesüngzükdaksüi alitsüa akok. Aji, Manipur state government-i inyaktsüba aser inyaktettsüba mapa ka liasü. Ajisüaka, iba tebilemtsü jagi Meie nunger o Kuki nunger na raratsü menügdaker. Kasaji, Myanmar len nungi machimajemtsü bener adoka ayokba mapatem nokdangsü mechi Imphal lenden nung aliba tenla kitem rongdoktsütsüa menügdaker. Ajisüaka, tanga kuli kecha mali, Myanmar len nungi ozüangi memelaba mozümora Manipur leni bener adoka ayokba nokdangsü atema Imphal lenden nung akaba Kuki nunger rongsen ajak aut-auyi kümtsür, Biren Singh-er külem yimsüsür Kuki nunger MLA-tembo tetsübu agi tatar sendenia dena marutettsüsa nübortem rongnung tesama aser takoksa adokdaksüba lenirji kanga dang shisa maka lenir, nübortem akoksatsü sotetba nebo ka asütsü. Lenir ka mapaji nisung tapu aika mulung südakja anitsüba mapa, anungji tetsür aser tebur kin kidong, oshi-oben, sobaliba aser tamangba yimsü balala süaka parnok ajakji liromedema tetsübu aser tarendak melii temzüng ozüng ka kübok litettsüsa inyaktsübaji lenir ka mapa aser khuret lir. Ajisüaka, asen yimten nung jenjang tajung ka alangtetnü dang, asen kin o par kin na aser aseni amangba tamangba yimsü o tangari amangba tamangba yimsü na tsüngda tsükchitepdaksütsüsa inyakra, khien atemabo takok angutsüa akok saka tatem nungbo timtem takoksa ajakji asenia makoktsüsa arutsü. Aji oda, Imphal lenden nung Kuki nunger azüjang kata melittettsüsa inyaktetba agi Meitei nunger asoshi tajangzük masü takoksa dang tulu bentsür arur asütsü. Alima tesem koba nung südirsüaka pei kin aser pei nebo kisüng agi alima maintsü aser merenloktsü, kechiyong alima renloktsü atema nütsüng nüngdaker. Aji oda, asen yimti nung tangar shinga mali asen kija süra shiba dang kechi yoka asenoka taküm alitsü ? Manipur-bo Biren Singh aliyonga maliyonga akhi Manipur tobo masütsüsa raksaogo. Joko, tangbo Narendra Modi aruyonga Manipur asoshi o tajung ka ashitsü makatsü aser Amit Shah-bo arutsü menügdaker.

OLEMSABANG

TANÜ ASEN AOR TESOTET SAMANIR APA-A AKÜM MASÜA NA?

~ L. IMLIKOKBA IMSONG, UNGMA

(Yashi adok nungi...)

2. Naga nungerji India nüchiso mangudang yongi India nunger dang nungi libaliru, achiajem, sobusolem aser yamala khenyongi balaka tangatetba liasüji 1929 nung Simon Commission ta sür noktakba lirko. Iba sülen India nüchiso angudang onokbo India den maden ta shia aruba kin rongnung Aora T. Aliba Imti aser Imkongmeren ama lenir aika liasüa to. Saka lia arudang Indian Government-i nüchiso bushir aser nüburtem dak taochi kanga meli-i kasetli, rishikangshili, tachi tajemtsü auyi kümtsüli ta inyakba maremtet nung, State danga agia atadi ta Naga kintem tashirtemi anir agizüka ata. Iba (Naga People Convention) nungjia lenir kar - Imkongliba, P. Shilu Ao, S.C. Jamir, R.C. Chiden Jamir, aser State Government kübok-a Sashimeren ama, N. I. Jamir ama, ano lenirtem aika liasüa to. Nüchiso atemabo maneni dang inyaka liasü. Saka kechiar parnok rongnung telemsa adoker joko par o par na tsükchitep adoka kasettep meso (India nunger den masü). Nüburtem asoshi joko saru telok aika nem agütsütsüsa aküm aser alima ludaktsü meso. Aser aji tanüa kechi jenjang nung lir? Reprangdangang, ni ashitsübo asenok ya kanga mokokmeiner aser tara tasü mesüdaktsür amai bilemer. Kechiyong mapai aodang atema jang (rice) angati lema agütsür, shirangra temang anepalutsü aser taküm kümzüksü temenok sen agütsür. Koda asen lima nunga züsenba nung kechi timtem ali? Metsüjang mashi ka tokshi nunga pasasa meyir nung koda? Inyakra Tsüngremi moatsüba lima-a to. Tagütsüri mesüra teyariri na aser ni koma ajirepa alitsü? Shisadangsü masü na? Teti yamai dangbo malitsü ta nibo shisadanger koda?

3. Shisaluyimba nunga Naga nunger rongnung asen Aor rongnungi 2nd Graduate asürji obala Mayangnokcha 1927 nung liasü. Iba sülenji ka khien ka khien ta asen Aor samanir sür Naga lima ajunga ramoka yimsüsür liasüa to saka tanü ya kechi jenjang nung lir? Tashir (samanir) chirtem aser semchirtemji anosa samanir asütsüba-ato kechiyong shia metetbaji pa nung lirsä asü ato. Joko asenok dang alitsü, mesüra lenirtem asütsü masüji ta bilemer asü? Kechi ajanga anua aküm? Oda mezüng samanirtemibo ochi shia kadi ka dang jungtepa alitsü sayubaji par tensa nung yamaji litetta sayu saka tanübo yamaji mesüi lia sayuba dang masü koba atakatem benlok? Nai manganüra aser maremtetra meyipa kü dang shiang aser züluang, aibelena melira na dang ashir masü ta angatetang. Saka kü tebilemba aser tangatetba agibo aibelenbaji Tsüngrem dangi bener ora aser taitok meshira Pai temoatsüji ano agütsütsü ta imlar.

Asenok Yisu dak amangertem ya Yisu ang kümli kanga ajung südi. Kechiyong temeshi Arogo ka nung atalokba osang nung anguba yamai iba Arogo nungji senotsütem timi mamshiba inyakyim. Tenüng menükdaktsü aser yabo odangbo masü ta bushitep nung shiba südir süang yim ka nungibosa asürji pa dang koda? Senotsüji kechi koda sür koma asüar shiang ta ashi nung pai ni Arogo indang sen ACHI ta langzü (Crore dak tema ACHI ta ashi). Aya-ya, iba jagi asen yimer kecha aibelen makai nai Arogo sen ACHIBA agi yimer kanga maaksü ACHIR. Anungji, maaksü ACHIBA yari mesüaka yimer-i ne dang sen meyirijang 50 ACHIR ta osang nung züngshir. Shibai metet iba arogoji ang masü ano arogo kwika nungsa atalokdar aji osang nung madoktsüaka alitsü südi. Tanü arogo dang meshiaka temulung lemteta aliba arogo aser mission maparen (Khristar wadang aser arogo asoshi) mulungsoa tenla-a alibato shibai metet item jagi mulungso teka terabo tzüla-akümer alitsü ta bilemer. Tanga lima nunga Pastor ka Rudolph Brooks, America lima nung 2020 April ita nungi September 2021 tashi Covid 19 Paycheck Protection Program nüngtem nung sen million 3.5 agiba puteta jail nung ita 18 puoka ayutsü temelaba agütsüba osang nung adoka liasü. Temeimbatem, ano yamala asenok Aor tsüngnep aika nung SAMANIR jenjang paitokba aikasa lir.

Tanü ni yangi ano aika inoka mezüluoki alitsü aser aji asa-a paitokba masü ta angatetdaktsünür aser iba asoshi mejashidaktsünür. Anungji nibo ajungshir, asenokbo khien Tsüngrem tsüngdang telungi atemshia lur ano temoatsü asoshiji mepishidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AI ajanga Laishiba meyipzükba maparen kera inyakteter: John Chesnut



Dr. John Chesnut

February 12, 2025: Alima nung oshi balala nung Laishiba meyipzükba telok Wycliffe Bible Translators-i, AI (Artificial Intelligence) ajanga Laishiba meyipzükba maparen kanga kera inyakdar, ta metetdaksü.

Alima nung oshi ajak nung Laishiba meyipzuka adoktsü nükjidong kanga kera ataloktsüa akok, ta Wycliffe Bible Translators-i metetdaksü.

Wycliffe Translators Tir, John Chesnut-i, "Pei oshi nung kodanga maliba Laishiba

adoktsü nükjidong nung onoki inyaker, aser iba nükjidongji yur onoki tesüiba küm 80 dak tali inyaka arudar," ta metetdaksü.

"Alima nung oshi 7,300 shi lir; tang tashi nung Wycliffe aser tanga Bible translation partners-i oshi 750 nung Laishiba rangben (Tasen Lai &Tejen Lai) meyipogo aser oshi 1,700 nung Tasen Lai meyipogo," ta pai metetdaksü.

Wycliffe Bible Translators-i Vision 2025 nung rangloker maneni inyaker. 1990s mapang

nung parnoki 2025 küm tashi nungbo oshi ajak nung Laishiba meyipmatsü nükjidong yua liasü.

"Tanü tashi nung onok indang list nung tanüngba oshi dang 888 lir, anungji 1999 küm nungi tang tashi nung wadang tulu inyakogo," ta pai ashi.

Iba takok atema pai Wycliffe indang partners Arogotem dang pelaba metetdaksü.

"Tsüngremi alima nung Pa Arogo ajungkettsüba onoki angur," ta pai ashi.

"Artificial intelligence ajanga-a shilem agir. Tsüngremi Pa sentsüwangshi atema iba (AI) ya amshir. Joko tesüiba küm ka shi onok ket nung hadir tasenba (AI) ya lir. Tasen Lai ka meyipzöker lira parnoki software nung inoktsü atema Tasen Lai nungjagi 'material' ji amshitsü aser anogo ishika tsüngda Tejen Lai 'draft' asütsü," ta pai metetdaksü.

AI ya ajanga Kibubai tenyaba wadang tekeraba nung renemba nung yaritsü ta ni amanger, ta paisa metetdaksü.

"Kibubai tenyaba wadang ya asen akümüli mapang nungsa renemtsü, ta shitetba mezüng putuji iba putu ya asütsü," ta paisa shisem.

Refugees agizüktsüji US teinyaktsü mapa ta Khristantemi bilemer

February 12, 2025: US nung Evangelical Khristantemi arrtsülen security atema inyaksangshitsüji tongtibang ta bilemer, ajisüaka linük balala nung reshikangshi ajanga jenshiba refugees agizüktsüji United States teinyaktsü mapa lir, ta bilemer.

Evangelical Khristantemisa, linük nung jenoka aliba bendangertem tajungtiba nung anepalutsüji Khristantem teinyaktsü mapa lir ta bilemer, ta survey tasen ka ajanga bushitet.

America nunger Immigration policy dak sendakba nung Evangelical Khristantem tangatetba asadanga Lifeway Research-i taküm January 13 nungi January 21 tashi survey ka agia liasü.

Iba survey sponsor tem rongnung Evangelical organizations- Evangelical Immigration Table, National Latino Evangelical Coalition aser National Association of Evangelicals indang World Relief densema liasü.

Taküm January 20 nü Trump-i Tir tenangzükba agiba süen Trump-i U.S. Refugee Admissions Program anentsüogo. Biden administration kübok 2024 küm kija nunga US-i refugees 100,000 dak tali agizüka liasü.

Evangelical Khristantem dang yamai asüngdanga liasü, "Refugees agizüktsüji US teinyaktsü mapa asü? US ozüng

kübok refugees tetezü kin, yimsü mesüra yimtenren tsütsülen nungi reshikangshi ajanga linük toktsür ajenertem lir."

Iba survey nung shilem agirtem nungi shilem 70-i, refugees agizüktsüji US teinyaktsü mapa lir ta ashi, shilem 23-ibo 'nunga' ta ashi aser shilem 7-ibo mejangja, ta ashi.

Lifeway Research Executive Director, Scott McConnell-i, "Evangelical teimbakati arrtsülen security akangshidaktsüner," ta metetdaksü.

Tanga linüktem nung reshikangshi ajanga jenshiba refugees meima anpalutsüji Khristantem teinyaktsü mapa asü? ta parnok dang asüngdanga liasü. "Evangelicals shilem 73-i au ta langzü. Ano shilem 55-ibo, ozüng alema yangi arua alirtem süaka Khristantemi parnok yaritsüla ta langzü," ta Lifeway Research-i metetdaksü.

Iba survey osang nung ajemdaker World Relief CEO, Myal Greene-i, "Tir Trump-i evangelical Khristantem taginüba ola angashitsü aser tanaben U.S. refugee resettlement program benoktsü, ta ni amanger," ta metetdaksü.

Greene-isa, kibongtem telongjem kümzüktsü, arrtsülen kümzüka ayutsü aser Tsüngrem mesükba nung yangluba meimchir ajak akhümtsübuttsü atema Trump-i inyaktsü imlar, ta

ashi.

US nung refugees jenokdaksüba maparen nung amshitsü atema US State Department-i melungtet telok aika nem senotsü teyari agütsür. Taoba ita State department-i World Relief dang refugees 4000 tenzüktsü atema sorkari senotsü agüja inyaksangshiba maparen ajak anenang ta tuyua liasü.

January ita tetenzüklen World Relief-i sangdong ka ajanga, US Tir shima alisang, Donald Trump nem "Refugees jenokdaksütsü atema Khristan sangdong" ta ser shidi ka agütsüogo, ta metetdakja liasü. Trump nem agütsüba shidi nungji National Association of Evangelicals nung lenirtem, Ethics & Religious Liberty Commission of Southern Baptist Convention nung lenirtem, Christian advocacy organizations nungi lenirtem aser alima tesem balala nung reshikangshi ajangshiba Khristantem temeden atema inyakertemi sign süa lir.

Trump mezüng US Tir inyakba mapang nung linük nung refugees 50,000 tashi jenokdaksütsü atema temelaba agüja liasü. January ita nung Khristan lenirtemi pa nem agütsüba shidi nungji pa dang maneni linük nung refugee 50,000 tashibo agizüktsü mesüra iba dang nungjagi teimba agizüktsü mepishia liasü.

ANOGO ABEN TSÜNGREM DEN

TAMANG NUNG MITA LIANG

Adianutem, taküm Tsüngrem nungi tsüksüsa nenok kar dak mamangba temulangjang malitsü kümdangang. Saka temenen tekülaktsübai nenok anisa-a lir ta sür "Tani" ta ajaba mapang ali tashi anogo shia kati ka ajungshiang.

~ Ibri 3:12-13

Shiti züluri Mosa mapang nung tamangertem tamang jenjang mezüng khristantem tamang den medemdanga ajungshia züluba angur. Mosa mapang mung tamangerteni Tsüngrem dak mamangtetba yong parnok Küm lir tashi Tsüngremi nangzükba anisüngzük lima jagi meiteti lisem lima nung nemzüa liasü. Parnoki chichia mamangterba yong parnok asoshi Tsüngremer sentong mataloki arem moapu lisem lima nung küm lir tashi nemzüa tim atem.

Kasa timtemji mataloktsü asoshi Ibri züluri mezüng Khrista dak amangertem dang parnoki tentenzük nung pei tamang koma akanga akanga sota liasü aji tatem tonga ameter alitsü ajungshi. Tsüngrem chistem asoshi anisüngzük anogo ka anünga lir anungji kasa tashi mangaba ajanga shinga metsüktsü asoshi Tani ta ajaba mapang ali tashianogo shia kati ka ajungshiteptsü indang shia angur.

Temeimbatem,tanü kasa o agi asenok danga ajungsbic Asenok tamang shitak meyutetba ajanga Tsüngrem nungi metsüktsüsa kümdanga asenok tamang mita alits merangdi. Tsüngrem mulung chidakja litetha, aser Ps anistüngzük ajangzүktetba tamanger ka ka asüsü asen tamang sarasadem südi. Amen.

Nepal sorkari America nunger Khristan 17 dang asüngdangya

February 12, 2025: Nepal nung sorkar ketdangsertemi India nunger ka densema US senso aika apuba sülen parnok dang asüngdangya, ta International Christian Concern (ICC)-i metetdaksü.

Southeastern Nepal nung America nungertem jagi evangelistic mapa inyak, ta tai tonglokja parnok pua asüngdangya.

Dharan yimti nung atalokba ya ajanga Nepal sorkari maneni Khristantem amokmerentsü merangba jangjar, ta ICC-i metetdaksü.

America nunger Khristantem jagi tourist visas ajanga Nepal semdang aser parnoki Dharan yimti nung kiojen ka asüba nung yaritep. America nungertem jagi iba tesem nungji alirtem den Khrista osang lemsatep, ta ketdangsertemi tai tongloktsü.

Nepal nung National Penal Code of 2017 ozüng kübok nisung ka yimsü meypdaksütsü memelar. 2015 küm yanglushiba Nepal linük temzüng kübok Arrla 26(3) ajanga, nisung kati ka yimsü meypdaksütsü memelar, mesüra tanga yimsü ka jenjang raksatsütsüsa inyaksangshitsü memelar.

Item ozüng amshia sorkar ketdangsertemi Khristantem anema inyaker.

Tawa Nepal nung ketdangsertem jagi India nunger ka densema America nunger 17 pua asüngdangyaba sülen chiokogo, ajisüaka tarutsü nung aibelenba putetra temerenshi alitsü, ta tekümdangtsü shir chiok.

Nepal nung sensotemi yimsü meypdaksütsü merangra küm 3 nungi küm 6 tashi tepuokdak ayutsü akok. Item ama ken o nung tai tongloktsürtem aika bail nung chioker, ajisüaka karbo mapang talanglang tepuokdak ayur.

2021 küm November ita nung pastor Keshav Raj Acharya aija küm 2 tepuokdak ayutsü obendang agüja liasü. 2020 küm pastor Acharya-i, Tsüngremi coronavirus tashidak aneptsütettsü ta sangdonga online nung video ka prokshiba sülen pa asemben apu aser tesüsa tepuokdak ayutsü obendang agüja liasü.

Nepal tesem aika nung Khristantem loktii sendoker aser Khristantemi lapokba dokantem nung shishilemba masür.

Nepal nung Khristantemi tasü mang ali nung arembaji Hindu nungertemi kanga ashishir, ibayongji Khristantemi aiben timtem ajangshir. Talisa Kathmandu Valley nungbo Khristantemi tasü mang aremtsü atema temelaba mengui kanga timtemer.

AO OSHI ANGAZÜKDAK:**TANÜ ANGAZÜKTSÜBA OJANG****Tejakzükba**

(n) soyapokyaa aruba tarensen (progenitor)

* Asenoki asenok tejakzükba tarensen junga meteta alitsüla.

Tejakzükdak

(adv) kin kidong tenzükdak, tetsütebouren (ancestral)

* Asenoki asenok tejakzükdak longtrok amshir.



Tir Yimyim

OLONG PAITEP # 7062

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN


1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7061 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA

Abu Dhabi nung February 10 nungi 12, 2025 tashi 4 buba Global Symposium on Implementation Support and the Global Sustainable Aviation Marketplace amongdang otsü tasen yanglutsüsa display ka sayua liasü. Iba ajanga "largest-ever aerial display of fireworks and drones" Guinness World Record yangluogo. Gala Dinner Ceremony nung drones 1,000 agi aonung anüing sangwatsü, drones 300-i rings yanglua sayu aser live fireworks 152 tashi apokba ajanga sentong kanga meraketdakja liasü.

Manipur nung tanabuba NE India film festival amonger

Imphal, February 12, 2025 (Agencies): February 12, 2025 nü Manipur nung tanabuba North East India Film Festival (NEIFF) 2025 tenzükogo.

Imphal nung aliba City Convention Centre nung agiba sentong nung Loktak Development Authority chairman M. Asnikumar Singh, Manipur University vice chancellor Prof. N. Lokendra Singh aser DM Community College director Prof. L. Hemchandra Singh nung aden.

Iba benjung ya THOUNA, Manipur-i Film Forum Manipur aser Directorate of Information

and Public Relations (DIPR), Government of Manipur den yaritepa ayongzüker. Maneni Ministry of Information and Broadcasting, Government of India, aser National Film Development Corporation (NFDC)-ia iba sentong nung teyari agütsür.

"Cinema ya tashitait sabang ka lir kechiyong iba ajanga asenok entertain asüba dang masü saka asen maitüsü aser taginübatem sayur" ta Loktak Development Authority chairman Asnikumar-i ashi.

"Tayongzükba aika liaka Manipuri cinema tejakleni odar aser

alimai ajitetter. Iba sabang ajanga asen sobaliba, tar nunger otsü aser lokti tebilemtsütem indang ola adoker. Tarutsü pututem nung iba industry züina aotsü atema asenoki filmmakers pusema nungittsüla" ta pai ayongzük.

THOUNA, Manipur-i iba sentong takok ngua ayongzükba atema Asnikumar-i tenüngsang agütsü.

Film Forum Manipur, DIPR, Government of Manipur, Ministry of Information and Broadcasting aser NFDC-i Manipur nung cinema renloksü yaritepba atema paisa pelaba shisem.

Assam CS-i Kokrajhar nung budget session atema reprangshim

Guwahati, February 12, 2025 (Agencies): Assam kübok Kokrajhar nung February 17, 2025 nü state budget session agitsü aliba atema Chief Secretary Ravi Kota-i maparen inyakba reprangshimogo.

"Iba otsüsütsü session tiptema agitsü atema mapa inyaksüla. Guwahati toksür tang mezüing atema iba session agitsü" ta chief secretary Kota-i ashi.

Paisa Bodo Territorial Council

(BTC) principal secretary Akash Deep dang department balala amalitepa maparen inyaksü tetuyuba agütsü.

Kota-isa budget session atema seating arrangements, catering services, uninterrupted power & water supply, fully functional sound system, medical facilities, fire safety measures, traffic management, aser officers & staff shitak lemozüksütsü tetuyuba agütsü.

"Iba ya Assam atema tongtipang sentong ka lir aser takok tulu ngudaksütsüla. Department shiai MLA aser tongti tejaokertem jangratema mongdaksütsü merangtsüla" ta Chief Secretary Kota-isa ashi.

Iba sentong nung Kokrajhar deputy commissioner Masanda M Pertin, SP Pushpraj Singh aser BTC department nungi secretaries o tekolakpurtem aden.

Manipur nung taoba minister kima nung grenade 2 angu

Imphal, February 12, 2025 (Agencies): Manipur Police nung bomb detection and disposal squad-i Bodbarnep grenade ana tashi raksaa endokogo.

Imphal West District kübok Singjamei nung Manipur Minister ka kima nung bomb ana ya yuja liasü.

Tanep 6:00 ako meta Thongju

Pheijaleitong nung taoba Manipur Minister Bijoy Koijam'er residential gate nung bomb ana yuja aliba angu.

Iba lenmang ajanga süir kari bomb anguba sülen police o bomb experts nem osang sangoktsü.

Iba sülen bomb detection and disposal squad-i ghonda 2 ser

tesadang ka shi agia grenade ana poksa endok. Game Village Langol nung aliba Dumping site nung parnoki iba mapa inyaka liasü.

Iba tatalokba atema kija mesüra telungpur telok shingaia tenüing agiba metetdakja mali saka police-i ken o ka benoker bushisüingdang südar.



West Tripura district kübok Manikyanagar nung Assam Rifles-i marijuana (ganja) seret 351 apu aser kasa mapang nung seret 1089 tashi raksaa endokogo. Parnoki apuba ganjaji Rs 1.58 crores shi alang liasü aser raksaa endokbaji Rs 3.27 crores shi indang liasü ta Assam Rifles-i metetdaksüogo. Iba maparen ya Assam Rifles-i Agartala Customs Division den külemi yaritepa inyakba liasü.

Gaza nung rara tenzükshira Israel amaktsü renema lir: Houthis

Sanaa, Tsüklai/February 12 (Agencies): Hamas den ceasefire yanglua aliba raksar Gaza nung maneni amaknungbo Israel amaktsü renema lir, ta Yemen nung aliba Houthis ajanga sangdongogo.

Houthis lenir Abdel-Malik al-Houthi-i Mongulbarnü television ajanga ashiba agi, Gaza anema tensa tamajungba kumra 'military intervention' tenzüktsü par telok renema lir.

"Onok tena trigger nung lir," ta pai ashi.

Houthis yagi Yemen yimtiba Sanaa densema linük anüolen tesem timba amokbanga lir aser Gaza nung rara tepiyong yangji aliba Palestine nunger bhukuma maka liasü.

November 2023 nungi tenzüka iba telok yagi Red Sea nung shishilempaba aser mitkar indang rong nung 100 ben dak tali makogo aser Israel tsütsü missiles aser drones khalokja liasü. Taoba ita Israel

aser Hamas na ceasefire tezüngzüktep ka yangluba sülen parnoki amakba ajemtsü ta shia liasü.

Ajisüaka iba tezüngzüktep ya noklem asem lemsaba nung tang mezüngbuba noklem nun gang lir aser Israel-i maneni iba tezüngzüktep nung aibelenba ajanga tensa tamajungba akumtsü amai ajiteter.

Ceasefire noklem mezüngbuba nung pua alirtem melenteptsü, Israel sepai kar Gaza nungi ainshitsü aser teyari tali airdaktsütsü dena lir. Noklem tanabuba nung inyaktsü ano merenem saka iba mapang rara jungjunga tembangtsü. Tatemsa noklem asem buba nung Palestine nunger aliba tesem ya tanaben yanglushitsü.

Israel-i ceasefire nung aibelena nisung tepseter, yirur alirtem temang anepalutsü atema Gaza yutsür aoba nung tenokdangba agütsür, aser teyari peria maidaktsür, ta

Hamas-i Hombarnü ashi. Israel-i shidak inyakra onokia iba agreement nung shia aliba ama maneni inyaktsü ta iba telok yagi ashir.

Ano Hamas-i Israel nunger pua aliba ajak Honibarnü teroto tashinung mechiokra ni iba rara anena aliba athitsü ken o benoktsü aser molumi rakbokdaktsütsü ta US Tir Donald Trump-i shiba ajanga tensa tali tamajungba akumer.

Telok anaprongi iba ceasefire akumtsüboa amshitsüla aser amokmeren o jembiba nung jenjang kecha maka saka inyakyim tali benjadaktsür, ta Trump-i jembiba langzüa Hamas ketdangsür Sami Abu Zuhri-i ashi.

Mongulbarnü video sangdong ka nung Israel Ato Kilonser Benjamin Netanyahu-ia Hamas madak takok mangu tashi mitkartem meyipa shilanga raratsü ta shia liasü.

Cabinet meeting ka ghonda pezü amenba sülen Israel leniri ashiba agi, pai Israel sepaitem dang Gaza Strip telung aser temeket nung adenshitsü totuyuba agütsüogo. Tang tashinung iba rara nung Palestine nunger nisung 48,219 tepsetogo, ta Gaza indang Health Ministry ajanga ashir.

Russia-i Kyiv amak; nisung 1 asü

Kyiv, Tsüklai/February 12 (Agencies): Russia-i anepdang züngia lia Kyiv amakba sülen civilian ka tepsetba den asem yirutsü aser yimti kübok tesem balala nung mi adokdakja liasü, ta Ukraine nunger ketdangsürtemi metetdaktsü.

"Russia-i missile amshia Kyiv yimti aser temeket maka liasü," ta tir Volodymyr Zelenskiy indang chief of staff Andriy Yermak-i Telegram messaging app ajanga metetdaktsü.

"Vladimir-i yamai rara anendaktsüner," ta pai ashi.

U.S. tir Donald Trump-i, pai Kyiv aser Putin na den tongtepratepa arudar ta ashiba sülen rara anendaktsütsü atema yimjung asoshi sensaksem tenzükshitsü akok ta timla taliba kümogo. Küm asem shi tejakdang Russia-i Ukraine amak tenzüka liasü.

Zelenskiy-i Mongolbarnü ashiba agi, Kyiv-i yakta US nunger ketdangsürtem den sensak asemtsü.

MOLUNGNEN O



ASO : 1941 | ASÜ : 09-02-2025

Onoki kodanga amatsü makokka temeim Ojala asür **L. IMOLA JAMIR** ajongbena iba lima toktsür tebu Tsüngrem den alitsü aoba mapang nungi tenzüka leper kiküm tashi Arogo, Yimden aser shirnokisa ozü asüko nung yaritepogo, nenok ajak dang meshitetba tepela tulu lemsateper. Onoki nenok nem meyipa agütsütsü kecha maka saka tajung Tsüngremi nenok ajak moajangma ta sarasademtsür

Temeim Chirnurtem, Anük Amotem aser Semchirtem.

ALI TAYOKTSÜ LIR

1. Old Showuba nung, 12397 Sqft. Four lane, fly over anasa.
2. Rs. 50 per Sqft. Aginüba tasazük angutsü.
3. (5 Pura) 1 Pura - 3,200,000/- Contact : 9863826159.

केनरा बैंक

Canara Bank

SALE NOTICE

DIMAPUR BRANCH

1 Floor, Latika Complex, Nyamo Lotha Road (Church Road), Dimapur, Nagaland, PIN- 797112, Contact: 9716900184

E-auction Sale Notice For Sale of Immovable Properties under the Securitisation and Reconstruction of Financial Assets and Enforcement of Security Interest Act, 2002 read with proviso to Rules 8(6) of the Security Interest (Enforcement) Rules, 2002

Tsünglanglen rasaa shia aliba belenshitsü makokka rongsen ya sen aputsü atema Canara Bank nem mortgaged/charged süa lir ta nübur aser talisa sen apur aser guarantor dang metetdaktsür aser ibai Canara Bank indang Branch dang sen apur aser guarantor nungi sen apua aliba menoktsü asoshi **27.02.2025** nü **"As is where is"** aser **"Whatever there is"** nung ayoktsü. Earnest Money Deposit (EMD) ya **26.02.2025** nikongdang 5:00 ako tashinung inoktsütsüla. Auction ya website: <https://baanknet.com> ajanga "Online E-auctioning" asütsü. Auction anogo aser mapang: **27.02.2025** anepdang 11:00 ako nungi nikongdang 1:00 ako tsüngta. (Ayokba metembang tashi mapang minute 5 atsülangtsü) Branch, borrower/guarantor, liability, description of the property and EMD, reserve price indang tejangja:

Sl. No.	(A) Name & Address of Secured Creditor/ Branch (B) Name of Borrower/ Guarantor	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
1.	(A) Canara Bank, Dimapur Branch, 1 Floor, Latika Complex, Nyamo Lotha Road (Church Road), Dimapur, Nagaland, PIN- 797112, Contact: 9716900184 (B) Borrower / Guarantor: M/s. Tizu Trade Agency Proprietor:- Kavito V Yephthomi (Guarantors) Kiyekhu I Sema	All that part and parcel of a plot of land covered by Patta No. 430, Dag No. 142/ 505, Mouza No. 03 block Dubagaon, Dist.- Dimapur, (Nagaland) land measuring 1 Bigha - 2 Katha - 13 Lechas. Boundaries (As per Sale Deed):- North- Main Road & Mr. Zakheto, South- Mr. Vinizhe, East- Main Road, West- Mrs. Shela	(A) Total Liab.: 73,28,610.69 + further interest & cost. (B) Reserve price: 55.68 Lakh (C) EMD: Rs. 5,56,800.00 (D) Increment Amount: 20,000/-

Iba indang terms and conditions tejangja metettsü asoshi Canara Bank indang website (www.canarabank.com) nung link "E-Auction" nung agüja lir mesüra Manager of Dimapur Branch, Contact No. 9716900184 den mapa inyakba anogo mashi nung office mapang jembitettsü.

Date: 05.02.2025, Place: Dimapur Authorized Officer, CANARA BANK

Trump-i nuclear tenangzüktepba indang jembiba Iran-i aitsü

Tehran, Tsüklai/February 12 (Agencies): United Nations dangi Iran indang ambassador-i, United States tir Donald Trump-i mebilemdangi lendong adokdaktsütsüsa tashiyim amshitsü amokmerena jembiba aitsüogo, aser parnok anema jenjang kar danga agira telangzüba tesashi agütsütsü ta t e k ü m d a n g t s ü metetdaktsüogo.

UN Security Council dangi yokba shiti ka nung Iran indang UN ambassador Amir Saeid Iravani-i, Trump-i osangbenertem den sensaksemba mapang nuclear weapons meyangludaktsütsü asoshi Iran ya bomb agi mesüra paper ka agi nokdangtettsü ta ashiba shisema lir.

"Parnok meyirutsüsa tenangzüktepba ka-ang nibo yanglula," ta Trump-i Hombarnü Fox News dang ashiba den, "ni parnok dak bomb mepokloktsüi ang tenangzüktepba ka yangluner," ta ashi.

Iran-i nuclear weapon yanglutsü meranger asütsü ta tsübua bilemba ajanga parnok tali nongshiba mapang ka nung tang Trump-i parnok amokmerenogo.

UN Security Council dangi yokba shiti nung Iravani-i, Trump-i

mebilemdangi jembiba aser pa olen dak lendong keta aliba ashishiogo.

"Iba amala mebilemdangi lendong adokdaktsütsüsa jembishinüba ya international law aser UN Charter aser talisa Article 2(4) anema lir, koba ajanga sovereign state ka anema tashiyim amshiba mesüra amomerenba nokdanger," ta Iravani-i shiti nung ashiba Iran indang official IRNA news agency-i metetdaktsü.

Paisa, parnok anema jenjang kar danga agira telangzüba tesashi agütsütsü aser iba khuret ya United States-i abentsü, ta shiogo.

Tehran-i ashiba agi, parnok indang nuclear programme ya yimjung asoshi lir aser nuclear weapons yanglutsü atema kecha tebilemba mali.

Trump mezüngbuba term tir inyakba mapang pai tenangzüktepba yanglur aliba nungi atsüngin aser Iran indang nuclear programme nem tenokdangba agüja liasü.

Tehran-i iba tenangzüktepba sülen tashi anga anidaka aruogo, saka Washington, DC atsünginba sülen parnoki uranium enrichment 60 percent purity tongdaktsüogo, koba 90 percent weapons-grade level lir ta UN nuclear watchdog tekolakba i December ita ashi.

JFK tepsetba indang file tasen aika ngutetogo: FBI

Washington, Tsüklai/February 12 (Agencies): United States Tir Donald Trump-i totuyuba agütsüba angaa FBI ajanga bushisüngdangba maoang John F Kennedy tepsetba dak sendakba record meyrirjang aika ngutetogo ta ashi.

Mongulbarnü FBI ajanga ashiba agi, parnoki file balala kaka bushiba mapang JFK tepsetba ken o dak sendakba digitized records aser inventoried tasen 2,400 shi taoba mapang mejangjateti aliba ngutet.

"FBI-i documents tasen ngutetba indang sangdong nüngdakba agütsüogo aser tang teinyakdak declassification process nung inoktsü atema National Archives and Records Administration dangi yoktsü inyakteptar," ta bureau ajanga sangdong ka

nung ashi.

JFK tepsetba dak sendakba file tanüngba ajunga den JFK tenu Robert F Kennedy aser civil rights asoshi nokdaker Martin Luther King Jr tepsetba file tanüngba ajunga sayatsü Trump-i taoba ita totuyuba agütsür tang FBI ajanga iba sangdong ya agütsür.

Lee Harvey Oswald kisüangi US tir ya tepset ta Warren Commission ajanga bushitetba nung America nunger shilem 65-i mamanger ta 2023 Gallup poll ajanga ashi.

Robert F Kennedy'er jabaso Robert F Kennedy Jr, shiba Trump-i health secretary atema shim, pai 2023 küm sensaksem ka nung tebutambo tepsetba nung CIA shilem agi ta amangtsüsa kuli lir ta shia liasü.

BAMTC: India-i 5-0 agi Macau kokogo



M.R. Arjun
Chirag Shetty

Tsüklai/February 12, 2025

(Agencies): Bodhbarnü China kübok Qingdao nung Badminton Asia Mixed Team Championships nung India team-i 5-0 agi Macau koka iba asayamung kanga junga tenzükogo.

Lakshya Sen, Malvika Bansod aser tarep asayar Sathish Kumar Karunakaran-Aadya Variyath, M.R. Arjun-Chirag Shetty aser Treesa Jolly-Gayatri Gopichand nungeri pei tata asaya koka liasü.

Tarep temeyoktep asayar Sathish Kumar Karunakaran aser Aadya Variyath nati mezüngbuba asaya nung lok Chong Leong aser Weng Chi

Ng na 21-10, 21-9 agi koka liasü.

Tebur kija asaya nung 2021 World Championships bronze medallist Lakshya Sen-i 21-16, 21-12 agi Pang Fong Pui koka India team 2-0 agi tejakdang aküm.

Iba sülen 2024 Hylo Open finalist Malvika Bansod-i tetsür kija asaya nung Hao Wai Chan 21-15, 21-9 agi koka India nem takok agütsü. Tebur tarep asaya nung Chirag Shetty aser MR Arjun nati 21-15, 21-19 agi Chin Pon Pui aser Kok Wen Vong na koka liasü.

Tatembangbuba asaya nung waorld number 9 tetsür tarep asayar Treesa Jolly aser

Gayatri Gopichand nati NG Weng Chi aser Pui Chi Wan na 21-10, 21-5 agi ayong ayonga koka liasü.

Iba asaya akokba sülen India team quarterfinal-i aitsü jangjaogo. Parnok taruba asaya Brehostibarnü Korea den asayatsü aser iba asaya ajanga par telok nung koba team temaba jenjang nung tembangtsü agi jangjatsü.

Quarter-finals nungibo tejakdangi atutsü atema India team-i kanga junga asayatsü nüngdaker.

India team-i Asia Mixed Team Championships nung tang tashi nung gold medal khen danga ngur mali, saka parnoki 2018 aser 2022 küm Commonwealth Games nung mixed team gold aser silver nguogo.

India team-i küm ishika tsüngda team asaya nung tajungba asaya arudar aser parnoki 2022 küm mezügbuba Thomas Cup akok aser 2024 küm Malaysia nung Badminton Asia Team Championships nung silver aser Hangzhou Asian Games nung tebur team-i silver medal nguogo.

Real Madrid-i goal 3-2 agi Manchester City kokogo

Tsüklai/February 12, 2025

(Agencies): Mongolbar nü Champions League play-off asaya nung Real Madrid-i goal 3-2 agi Manchester City kokogo. Mapa apuloktsür asayaba mapang Jude Bellingham-i goal ka idakja Real-i iba asaya koka liasü.

Asaya nung Erling Haaland-i goal ana idaktsüba ajanga Pep Guardiola-i aniba team nem timla agütsü, saka iba asaya akokba sülen defending European champions ya round of 16-i aitsü timla tuluba kümogo.

Asaya nung mezüngbuba goal ya Haaland-i minute 19buba nung Thibaut Courtois ajanga idakja liasü.

Asaya tanabuba shilem tenzüker minute 60buba nung Mbappe-i Madrid atema goal ka idakja goal kasasa küma liasü.

Aaaya atemtsü minute ter shi anunga lia Ceballos-i Phil Foden alangdaksüba sülen penalty ka agütsüba Haaland-i idakja maneni parnok tejakdang aküm.

Ajisüaka minute 86buba nung taoba mapang City asayar Brahim Diaz-i Madrid atema tanabuba goal idatsü aser mapa apuloktsü asayaba mapang Bellingham-i Madrid atema tasembuba goal idakja parnoki asaya akok.

Kasa mapang nung PSG-i goal 3-0 agi Brest akokba asaya nung Ousmane Dembele-i goal ana idakja liasü.

Asaya nung PSG atema mezüngbuba goal ya Vitinha-i idakja liasü. Iba sülen asayamung mezüngbuba shilem tembangtsü lia Dembele-i par team asoshi tanabuba goal idaktsü.

Maneni asaya tanabuba shilem tenzüker tomka aoba mapang Dembele-isa par team atem tasembuba goal idakja liasü. Iba asaya nung goal ana idaktsüba sülen pai asaya 11 nung goal 18buba idaktsüogo.

Turin nung mezüngbuba led asayaba mapang Juventus-ia goal 2-1 agi Eindhoven kokogo. Asaya nung Weston McKennie-i Juventus atema mezüngbuba goal idaktsü saka Ivan Perisic-i Eindhoven atema-a goal ka idakja kasasa aküm.

Iba sülen asaya tanabuba shilem nung minute 82buba nung Samuel Mbangula-i Juventus atema tanabuba goal idakja parnoki asaya koka liasü. Honibarnüsa Borussia Dortmund-i goal 3-0 agi Sporting Lisbon kokogo. Parnok rongnungi Pascal Gross-i goal ana aser Serhou Guirassy-i goal ka idakja liasü.

Starc Champions Trophy nung masayatsü

Tsüklai/February 12, 2025

(Agencies): Australia nung fast bowler Mitchell Starc-i Champions Trophy nung masayatsü atema telemtetba agiogo.

Australia team nungi captain Pat Cummins, seamer Josh Hazlewood aser all-rounder Mitchell Marsh nunger yiruba ajanga masayatetsüsa akümbe den all-rounder Marcus Stoinis-a ajungbena ODI asaya nungi anenba sülen tang Starc masayatetsüsa akümbe ajanga team asoshi tetsükdaktsü adokogo.

Arishi küm 35 tain Starc-i kechiba iba telemtetba agi iba indang kuli magütsü aser pa minprong masütsü mepeshia asüngdangogo.

Left-arm bowler shibai one-day internationals 127 nung wicket 244 agir lir, pa November nungi February tsüngda India den kidang Test tenetprongla aser iba sülen Sri Lanka den asaya ajak nung asayaogo. Seamer tem rongnung pa kijai asaya ajak nung asaya liasü.



Pa masayatsüsa akümbe sülen Spencer Johnson, Nathan Ellis, Sean Abbott aser Ben Dwarshuis nunger anungogo. Parnok ajak senteper ODI 37 dang asayar lir.

"Onoki Mitch-i kechiba iba telemtetba agi aji angateter aser akümstübur," ta chair selector George Bailey-i ashi.

"Mitch-i international cricket asayatsü atema bendanga agütsür aliba aser Australia tenüng nungi asayatsü atema mezüngbuba südaktsüba atema ajaki akümstübur."

"Pai tia tensa ajak nung asayateta aoba kanga junga

mangaoka lir aser pa indang career nung tanga maongkatem toktsür pai linük mezü südaktsüba ya tenüng asangtsü langa lir.

"Pa masayatetsüsa akümbe ya Champions Trophy atema takoksa tulu, saka iba ajanga tangar ka nem maongka agütsütsü," ta Bailey-i ashi.

Cummins' masayaba mapang nung Travis Head masü saka Steve Smith captain asütsü shimogo.

Champions Trophy ya February 19 nü tenzüktsü aser Australia team mezüngbuba asaya England den February 22 nü asayatsü.

Australia Champions Trophy squad:

Steve Smith (captain), Sean Abbott, Alex Carey, Ben Dwarshuis, Nathan Ellis, Jake Fraser-McGurk, Aaron Hardie, Travis Head, Josh Inglis, Spencer Johnson, Marnus Labuschagne, Glenn Maxwell, Tanveer Sangha, Matthew Short, Adam Zampa. Travelling reserve: Cooper Connolly.

ICC Champions Trophy event ambassador asütsü Dhawan shim

Tsüklai/February 12, 2025

(Agencies): International Cricket Council-i, taoba mapang India nunger opener Shikhar Dhawan, taruba ICC Champions Trophy atema event ambassadors pezü shimba nung züngoksemogo.

Iba asayamung ya Pakistan aser Duban na nung February 19 nungi March 9 tashi asayatsü.

Tanga ambassador asem rongnung 2017 küm Champions Trophy akokba Pakistan team captain Sarfaraz Ahmed, taoba mapang Australia nunger all-rounder Shane Watson, aser New Zealand nunger fast bowler Tim Southee densema lir.

Ambassador tem yagi guest columns lemsateptsü aser asayamung indang parnok tebilemba

lemsateptsü atema asayatem nung shilem agitsü.

"Champions Trophy nung shilem agitsü jangradema bilemer aser taruba asayamung nung Ambassador ka ama shilem agitsü ya tetushi tulu lir," ta Dhawan-i ashi.

Dhawan ya Champions Trophy nung India nunger asayatem rongnungi run timtiba yangluba asayar lir. Pai asayamung ana nung run 701 yanglur lir. Iba asayamung nung run timtiba yangluba atema anaben atonga Golden Bats anguba asayar pa kija lir.

2013 küm Champions Trophy asayaba mapang pa nem Player of the Tournament naroküm agütsü aser Champions Trophy puti otsü nung pai century timtiba yanglur lir.

BILEMDANGANG

"Mapa tajung inyaktsü tanüa mapang tajung lir."